

SARS e lemosa ka Boikobelo ba Thepa ya Khripto

Tshwane, 9 Mphalane 2024- Ditshebeletso tsa Lekgetho tsa Afrika Borwa (SARS) di hlokometse kgolo e makatsang ya tshebediso ya ditjhelete tsa dijithale ke bongata ba Maafrikaborwa. Se hlahellang ka mahetla ho tsena ke ho ata ha thepa ya khripto. Ke palo e kgolohadi ya Maafrikaborwa a fetang 5.8 million ba nang le thepa ya khripto, moo Borwa ba Afrika bo nang le palo e kgolohadi ya batho ba sebedisang Bitcoin lefatsheng ka bophara.

SARS e kgathatswa ke hore thepa tsena tsa khripto mmoho le kgwebisano ya tsona ha di tsebahatswe dikgutlisong tsa balefalekgetho. Ka molao SARS e lokela ho jara boikarabelo ba lekeno kapa thepa efe kapa efe e tshwerweng ke balefalekgetho le eo pejana e kileng ya ba karolo ya phapanyetsano ya khripto mme bao ba nang le seabo kgwebisanong le ho ba beng ba thepa ya khripto ba lokela ho tsebahatsa diketsahalo tse amanang le sena ka boithaopo. Ho latedisa taba ena, SARS e tla akaretsa thepa ya khripto maneneong a yona a boikobelo. Ka lebaka la seo, SARS e ntse buisana le *Financial Sector Conduct Authority* (FSCA) mabapi le ho fumantshwa lesedi le mabapi le bafani ba ngodisitsweng ba ditshebeletso tsa khripto ba bitswang *Crypto Asset Service Providers* (CASPs). SARS le yona e fumana lesedi ka kotloloho ho tswa diphapanyetsanong tsa lehae.

Hwa bohlokwa, ho tlameha ho toboketswa hore ka tshebediso ya ditumellano tsa mafaphafapha SARS e fapanyetsana lesedi le mekgatlo e meng ya taolo ya lekgetho lefatsheng ka bophara. Phumantsho ya diakhaonto tsa mose tsa dikhripto e tla ba karolo ya ditumellano tsa mafaphafapha e tlang ho saenwa ke Matona a tsa Ditjhelete ka Pudungwana 2024 mme e tla etsa hore ho be le phapanyetsano ya lesedi mabatoweng a molao ka lesedi le jwalo le mabapi le balefalekgetho ba Afrika Borwa.

SARS e kgolwa hore bongata ba balefalekgetho ba a tshepahala ebile ba lebelletswe ho thuswa ho phethahatsa boitlamo ba bona ba molao. Ho latela thomo ya yona ya molao, SARS e fana ka nnetefaletso le tlhakisetso mabapi le boitlamo ba balefalekgetho le bahwebi. SARS ebile e sebetsa ka matla ho nolofaletsisa le ho etsa hore dintho di be bonolo bakeng sa balefalekgetho le bahwebi hore ba tsebe ho ikobela boitlamo ba bona. Hwa bohlokwahlokwa, ke maikemisetso a rona ho thafalletsa le ho etsa hore ditjeo e be tse hodimo bakeng sa bao ba ikgethelang ho se ikobele tefo ya lekgetho ka boomo. Mekutu ena e ikemiseditse ho tshehetsa maikemisetso a rona a Mawala a ho kgothaletsa tlwaelo ya boikobelo ba tefo ya lekgetho ka boithaopo.

Ka lebaka la seo, ka ho sebetsana le taba ya boikobelo ba khripto, SARS e eketsa bokgoni ba yona ba dihlopha tsa yona tsa oditi tsa ho tshehetsa mekutu ya boikobelo. SARS e se e tshepetse hodima tshebediso e kgolwanyane ya bohlale ba maiketsetso, boithuto ka motjhine le manollo ya dipalopalo ho bebofatsa mosebetsi wa rona. Phethahatsong ya thomo ya yona, SARS haufinyana tjena e ntshitse mangolo a dipotso a lebang ho

balefalekgetho ba nang le thepa tsa khripto. Mangolo ana e ikemiseditse ho fumana tsebo e batsi mabapi le botsetedi ba molefalekgetho thepeng ya khripto mmoho le kgwebisano e bileng teng ho thusa SARS ho hlahloba boikobelo ba balefalekgetho mabapi le sena.

Balefalekgetho bao ka mohlomong ba ka angwang ke sena mme ba kgathatsehile ka boikobelo ba bona ba thepa tsa khripto ba hopotswa ka Lenaneo la Tshenolo ya Tsohle ka Boithaopo (VDP) ho bebofatsa boikobelo ba bona. Monyetla ona o na le maemo a thata. Taba ya pele molefalekgetho o tlameha ho leba ho SARS pele. Hang feela ha SARS e se e kgethetse molefalekgetho oditi, ha a sa kgona ho etsa kopo ya VDP.

Khomishenara ya SARS Mong. Edward Kieswetter, o boetse a hopotsa balefalekgethoho ikobela boitlamo ba bona ba molao ka botshepehi. O itse: "SARS e ntse e sebetsa ntle le ho phomola ho netefatsa boikobelo ba balefalekgetho kaofela, mme bao ba qobang boikarabelo ba bona ba etsa hore morwalo e be o moholo bakeng sa balefalekgetho ba ikobelang tefo ya lekgetho. Sena ha se leeme feela ho balefalekgetho ba tshepahalang empa se boela se ama ba kotsing ya ho utlwiswa bohloko setjhabeng ka tsela e sa lekaneng ka ho nonyetsa bokgoni ba mmuso ba ho fana ka ditsiane tsa thekolohelo mmoho le melemo e meng e hlokehang haholo ya thekolohelo. A bohle ba tsebe hore theknoloji e ntlafaditse bokgoni ba SARS ba ho tsumula ka metso balefalekgetho ba sa ikobeleng tefo ya lekgetho. Lemoha, SARS e tla sala mora o bohle ntle le tshabo, leeme le ho inkela diqeto."

Ho fumana lesedi le fetang lena, ka kopo ikopanye le SARS ka SARSMedia@sars.gov.za